

## Quel che scrivo

A ci se le tól  
ghe domando “scusa”:  
de farlo divertir  
la m’è andàda sbuza.

Mi parlo de robe  
che sucéde dapartùto;  
qualcosa me invento,  
ma nò proprio tuto.

Esagero ‘na s-ciànta  
par robar ‘na sganassàda;  
el ridar el fà ‘n gran ben,  
el condisse la giornàda.

Paura no se g’à  
del can che sbàia.  
Ci rosso el devènta  
el g’à la cóa de pàia.

## Trent'ani fa

Quando tra l'erba lustra,  
sbròca la prima viola,  
el giòsso, in montagna,  
pian pian el se mòla.

Quando i prà i se svéia  
e i riciàpa el so color,  
i córi i se desmissia  
e i festégia l'amor.

El dì de san Valentin,  
zà l'inverno el va indriò;  
la sùpia la primavera,  
zà la scalda el cór mio.

Te lo digo co' un fior,  
co' 'n regàl da póco o gnénte...  
Mi te vói 'n gran ben  
e ti tiéntelo inaménte.

## **Trent'anni dopo**

Sta matina el m'à sveià  
co 'n soriso sènsa dentiera,  
co' 'n pigiama da desgrassià  
ch'el m'à ricordà quel che prima gh'éra.

I so cavéi i paréa 'n nìo  
dopo che à supià la bora.  
'Na òlta l'éra el spóso mio,  
adesso gnanca sò s'el d'è ancora.

Davanti a i òci, me sòn vista 'na rosa  
e, sènsa ricordi de i tempi bei,  
g'ò domandà co' 'n'expressión curiosa:  
“Èla la festa de i fradèi?”

## La tèrsa età

Prima sémo stà morosi e dopo spósi.  
Ani fa, lu el ricordàa anca el primo bazo,  
de quando uno de l'altra ériño golosi...  
Adesso, l'è da 'n pèssò che sopòrto e tazo.  
L'è messo su pansa come 'n gal castrà,  
e se te senti lu, no 'l magna quasi gnénte;  
dal peso le gambe le ghe s'à piegà,  
el g'à sempre caldo se me ghe tiro arènte.  
Se ghe digo 'na parola lo confondo,  
el me dà 'n'ociàda dizéndome "tazi":  
al cruciverba el g'à da rivàr in fondo...  
Me vien da piànzar se penso a i so bazi.  
Ciapàa de le remenàde da restar insemìnìa,  
co' la barba, el me cavàa tochetìni de pèle,  
e mi i sentimenti me sentéa andar via,  
me volàa farfàle parfin ne le buèle.  
'N bazéto el me lo dà a Pasqua e a Nadàl,  
su le pónte de la peluria, che gnanca lo sento.  
Ne le càuce l'è finìo el me moràl:  
pensàa che restàsse almànco el sentimento.  
"L'è 'na festa da schèi san Valentin!"  
par lu 'na pastina la m'è indigesta;  
par mi no gh'è più gnanca 'n regalin,  
co' i parfùmi me ciàpa i giramenti de testa.  
Ghe l'ò dito tante òlte che l'è l'artrosi,